



鹿裘石室集卷第二十

宣城梅鼎祚禹金著

文

行狀

迪功郎桐鄉丞東潭高公行狀

蓋余邑有高桐鄉公桐鄉公其先隱于耕公少而入郡與諸賢豪長者遊心竊慕也攻儒術不售以文無害補郡功曹郡太守與功曹從事事常辨及眡獄桎梏銀鐺血肉塗地功曹輒能左



右之迺進給南金吾史金吾卒數萬人盡屬史受饗饒鈞有質成史輒爲平卒以此益附史久之除饒樂平簿邑俗剽疾輕扞于有司簿日訊十餘牘率孳孳務民和不欲深抵簿主治賦往多里魁代攝之橐舉而銖累初私內舍人金嘗簿簿微知召舍人扶庭下按其臯嘗者遂咋舌去而賦竟集河南濟庾厓比夷于壤粟易陳簿惟之曰吾任其廉孰任其名汙者爲其遽廬而孰爲其主舍者迺斥奉鳩其役卽繕城諸役簿

爲埴矣越嘉靖丙寅而遷桐鄉丞桐鄉故兩丞一治賦中丞臺疏裁桐鄉丞則公當裁中而會治賦者歿民請得屬公不報報許徙他邑而公遂自免歸凡簿及丞五載部使者勞檄以二十數摺紳士歌術其事者以百數大都謂公介覆具材諳云公魁梧美髯固功曹造次被服必于儒者余聞公舍中公父處士公嚴諸子公獨用介子得處士驩念母孺人春秋高當需次天官久不往季弟天撫季弟子棟如其子而方公

子維岳舉于鄉也岳乎吾語汝吾鄉爲功曹時嘗遭遺金于道而舉以畀亡者簿治賦羨金于橐而舉以畀賦者且緩急人所有吾不能以無爲解而頗起困者家潭上而因爲舟干涉者有雙鯉入于舟而岳以至于斯也敢所稱修而息之乎而庶幾異日毋傷而翁志其事詳岳所自具中而公捐館之明年維岳涕下就不佞曰先迪功業已卽幽將圖所以不朽于史氏而論始于子不佞唯唯旣覈其事鉅者而世系如左公

諱宗漢字汝相世爲宣城後潭人繇郡功曹歷仕迪功郎並前具曾王父瑄王父玉鑑考文富並以高年爵一級文富內吳孺人舉四男子公仲子以正德壬申十一月十八日生萬曆戊寅七月十日卒年六十有七葬邑東新霽山配吳氏子一維岳領癸酉應天鄉薦娶羅氏出邑諸生衣錦女二長歸梅處士時昌子太學生繼唐次歸屠太常羲英子寧國邑諸生玄圭孫一美孫女三長聘徐太學篤慶子日隆爲浙憲使元

氣孫次聘孫太學惟訓子某是爲平陽守濬孫  
次未聘

劉母杭孺人行狀

杭孺人者三河簿杭公璋女而歸劉公子太學  
生伯興劉公起家令漳平稱漳平云嘉靖中三  
河家故千戶侯當嗣棄去爲博士弟子倜儻負  
氣不下人先是漳平爲博士弟子業有聲三河  
迺獨下漳平時人爲之語曰士相頡頏劉與杭  
此兩人者驪甚也屬永嘉當國以郡邑歲貢士

猥不稱任使議如里選行則兩公次第在選中  
已入太學爲同舍生同舍生並有子從於游三  
河固已目屬劉氏子矣是時孺人生十年長太  
學以倍也客有居其間約爲昏姻不果及還里  
而三河卒以孺人歸太學重心許也歸亾何舅  
漳平方宦學什九在外太學處守孺人以冢婦  
當戶姑後孺人性敏給孺人婉婉奉姑驩退而  
操作攻苦梱以內一切倚辦孺人漳平數竒累  
不第授桐廬丞孺人行與太學俱丞三年遷漳

平令漳平有家丈人在留孺人事家丈人里中  
而以太學行孺人婉婉奉家丈人驩退而操作  
攻苦又無不如事漳平後孺人者以故漳平得  
無遠親憂而太學得無內顧一意侍漳平邸中  
漳平爲良吏最著而會所生母孫孺人訃聞格  
于制遂投劾歸孺人聞之曰惜也令伯誦孝無  
窮矣而于臣道不終吾舅其舉全者邪孺人父  
三河厭爲簿先漳平自免去孺人喜相勞曰大  
人故疆項奈何折腰以升斗哉孺人往往以孝

謹名至其達節覆如此孺人嘗病胃輒舉輒已  
越歲已已再舉迺不起實冬十一月十六日也  
初孺人生子文顯顯穉弱孺人時時以廣媵請  
而太學不許孺人又先後舉三子太學仲弟子  
與其叔子同月舉而仲弟子疹不吉太學穆卜  
願以已一子代孺人則左右力贊之卜不應孺  
人時時趨仲婦以廣媵請而仲遊太學媵一姬  
踰十年而仲再媵一姬姬有子仲語余伯起舉  
桐廬時適嫂氏舉一女家孺人不良乳嫂氏兼

伯起乳之眎伯起如其女禮言嫂亦可謂之母乎伯起則然蓋孺人卒之十三年而子文顯次其事以二仲來稽顙泣謁余小子爲之狀余先太中及家恭人並劉氏甥而漳平公仲女余丘嫂余丘嫂言孺人在壺中食不貳膳然于臑臠菹醢之具必時衣不帛然于絲繭織紵組紃必工訾笑不苟然于妯娌臧獲常雍雍安之性纖儉不妄費然于門內之親多所段貸不問償嗟嗟婦順備矣文顯好古能文章而有質行二仲

翩翩有父風余聞孺人永訣以繕性戒文顯其內教可知也謹掇其大都且爲狀以論始于二三君子孺人生嘉靖甲申六月二十九日春秋四十有六生子四文顯邑學生娶余甥麻氏爲鴻臚涵女文達娶張氏爲太學生喬然女文榮娶梅氏爲醫學一相女文華後孺人五年妖女一適徐中允孫男一未名孫女二長文顯出聘諸生吳伯敬子爲汝州守孫一文達出未聘

亞中大夫浙江布政使司右叅政玄峰葉

公行狀

萬曆丁未春二月戊午少方伯玄峰葉公終于家蓋春秋七十二云當嘉靖季年盱江羅先生守宛陵耿恭簡先生爲督學使者倡明正學羣多士于書院先大夫實主教事嘗言公于二先生曰葉生載道之器也二先生頷之其年試高等受廩凡十二年丙子舉于鄉又十年丙戌舉進士初除上高令江右上高號難理而最難在逋稅善抵冒公爲鉤校其主名時與裁濶陘宿逋

一清而法大猾之蠶食邑帑者數人以才優治劇徙餘姚姚故眎上高劇矣甫至夏旱雩而雨蓋徒步且拜赫日中者閱月也以歲婁儉謝謁飲減經費以鍰金易穀躬歷鄉都饑者口賦之汝沈牟山諸湖田及海墾地爲豪所侵者悉假資并貧民而下石以楨湖口堰廟山爲永利載翁尚書孫大司馬碑記中而饑後賦所爲不及蠲者亦以集盜賊衰止則司馬猶稱其難焉所識士若戴君魯君咸取高第前以上高分校庚

子試得士爲盛則已誦公能知人矣令先後七年遷戶部主事是時孫公爲御史大夫謂姚令當有異宜改銓曹議中格公意泊如也監吳允疏請寬租吳民賴之已督儲南徐出內期會並有經式絜爲令至今遵行之稍敘遷郎中出爲河間守比方有東旅之興貴璫以權使臨者相望於道瀛卽連十數城以爲郡固雕敝內迫橫歛外困徵發公調酌多方機宜悉當乙未間蝗且疫斥奉勸輸所存活萬計旁大郡流人來占籍亦千計任丘有殺人而其叔中常侍爲芘得緩死公竟置諸辟入覲舉三輔治行第一遷浙江按察副使備兵寧紹職雄地大爲政頗嚴山陰巨姓馮執力而賤市族故中丞之居公追如其直禁緇黃逐巫覡以砭越之襪月旦帥其屬衍文成良知之教士烝烝鄉學三郡亦漸修禮讓訟希簡甲辰秋以入賀過里門雅倦游矣遂上疏請致事不報久之有蜀藩之遷尋復用右叅政分守杭嚴兼攝諸道公應之暇豫也爲

兩臺所依重未幾復請歸當路力挽之不待報而行實丙午之臘月也明年春當大計人言及之而公爲吏廉所職多錢穀無所入其羨卽南牀厯適公老耳而亦稱有守公聞之輒然曰吾誠老則吾已懸車吾誠有守則吾果垂橐知言哉再閱月而遽終終之日日禺中方謁客下春休與室嗑中覺咯咯有聲瞑矣公寬然長者和煦易親至蒞事操論挺然不隨樸素自將使後世師吾儉然不至矯而偏下官藩大夫而產不

逾中人年七袞而居鄉未嘗失色室絕姬媵門罕雜賓其自勛之言曰天下惟道德爲不毀獨真實能長存則於學抑庶幾闕其大矣所著有閒中漫稿還古約陰隲抄薛王要語歸田警巧拙苦樂二箴忠孝窮達諸說皆足維世教公之子士弘等翩翩有父風述次公質行纒纒數千言詣鼎祚泣拜曰先子嘗游於子先子又友子子其爲狀以介于名世之立言君子志諸幽而表之傳之鼎祚敬諾掇其鉅者什三而系之狀

狀曰葉公名煒字文光宣城西里人其先國  
初有遇時者以從征功授明威將軍生子貴凡  
四傳爲公之高祖椿曾祖寬寬長子鵬爲公祖  
鵬子芬則公父贈公也以公貴凡三命至中憲  
大夫按察副使母蔡氏累贈太恭人以嘉靖戊  
戌十月十四日生公配王氏郡學生王君份女  
累封恭人先公七年歿在守瀛之四年懿行別  
載生丈夫子三士弘貢生娶于王嗣美太學生  
娶于劉嗣英太學生先公卒娶于張繼郭女二

長適諸生裘應期次適戚親臣男孫十一人瑞  
徵吉徵淑徵爲士弘出奇徵嘉徵譽徵慶徵壽  
徵福徵爲嗣美出久徵彥徵爲嗣英出瑞吉邑  
學生女孫出土弘四人嗣美一人曾孫男一人  
雲初曾孫女一人並出瑞徵婚字皆右族謹狀  
揚州府儒學教授前承事郎廣州府番禺  
縣知縣實齋徐公行狀

徐公諱大望字德甫宣城人按譜其先出徐偃  
王在宣城者則宋政和中駕部公處仁隱歛之

沙谿子知柔自歛徙稱大徐村知柔子光遠孫  
夢雲並舉進士入明有景者永樂癸未舉于  
鄉仕嶧令見郡志累傳爲宗政公宗政子廷雄  
長生贈南京工部侍郎紹貞公爲公祖贈南京  
工部侍郎雙泉公沛實紹貞公子而公之父也  
母贈太淑人王氏四乳而生公仲兄爲今少司  
空覺齋公大任祖父贈以公徐氏世業詩兄弟  
間攷質論難相師友公猶刻厲沈深于經術著  
嘉靖辛酉籍郡學歷萬曆戊戌舉進士凡三十

八年制文之繁簡異體奇正異尚譎宕僻嶮其  
變不勝窮公獨于文典而裁清醇密緻守故常  
然卒取高第朱太史國禎首舉之是時年餘五  
十矣初授廣之番禺令越三月持贈公喪歸里  
公除以疾請徙郡博士授揚州無何疾劇竟不  
起先是戊子秋公旣見錄復誤落事聞以久  
受廩厯與貢而歲薦當貢君克承公固讓得特  
薦甲午始與湯司成偕上廣故饒宦者每指橐  
而鹽之利公矢志廉白又善晰民情當路者灑

然異之惜其去蓋公壯時謂治生可以成學卽  
仕可以養廉因以其暇相原隰權奇羸用纖儉  
佐之而家致饒若爲埴里之笄龠壩歲饑而平  
糴多假貲貧民有鬻其子者爲折券要非直自  
封而已及公第仲公先且位列卿一時鼎貴迺  
其車徒簡約門庭晏如也而一無所勤有司當  
世士居貧類不事力作俛而造請以爲利侈費  
之以爲豪一通籍間席世資高措遠引肅客不  
下堂擇便益田宅折闕而市之蒼頭廬兒漿酒

藿肉揄袂跼屣以叢僭其身而府怨其主以眎  
公仲季何如哉故公歿而閭巷良有遺思焉公  
歿之三年公子汝覲汝驛述次其行履以語余  
公之內行甚修也性孝友贈公有七子公撫事  
咸得其驩族子從翼孩而孤鞠之俾有立方持  
贈公之喪也處苦由不內溼中脾以疾而公生  
平造次被服必於禮子弟或小失尺寸必面譙  
不少寘余徵之其鄉人信無溢辭已而二子奉  
司空公命將圖爲公不朽者于文命鼎祚草公

狀以爲質逞歲辛卯鼎祚嘗從公于北靡留輦  
下旁睹時事有所不可輒相與扼腕慨悒幾異  
日一有所得當公管以和令謙脊名余與公晚  
合而後知公之厚重不泄庶可寄大事者也年  
與位皆不副其志度悲夫遂略銓二子所述次  
具如右公以嘉靖甲辰五月二十六日生萬曆  
壬寅八月十一日卒廣陵官舍春秋五十有九  
娶蔣氏蔣翁某女故諸生二子卽汝覲汝驊以  
文學競爽世其家汝覲太學生娶梅氏余從兄  
按察照磨隆祚女汝驊邑學生娶裘氏郡學生  
裘君應瑞女女二適楊平度君德望子太學生  
士彥湯興國君以栢子郡學生必選男孫五鼎  
時娶邑學生湯君廷對女明時聘行人沈君有  
則女顯時聘戶部主事張君守道女昇時並覲  
出襄時驊出尚幼女孫二覲出者適光祿監事  
葉君士弘子太學生吉徵爲葉大叅公煒孫驊  
出未聘

累封宜人韓母陳氏行狀

陳宜人者衢州府知府高淳湖南韓公諱邦憲之妃也衢州父爲湖廣憲副鳳橋公叔陽母爲黃恭人宜人以萬曆歲甲寅六月十八日卒于寢厥子文學仲孝以其冬十月某日葬宜人邑石白社之陳武村先是衢州公葬邑松園村有楊孺人者從已徙葬衢州于漂水羅山而楊留松園如故與今陳宜人竝不祔衢州當衢州年十七受室于同里之楊是所爲楊孺人者也禮有之子甚宜其妻父母不悅則出之孺人不幸

而罹是然敬待命于楊者九年所爲嘉靖乙丑憲副公歿孺人私持婦服哭盡哀黃恭人閱其意爲釋憾復之館于外是時衢州前用署虞衡員外郎主事考封宜人爲安人又九年壬申用衢州刑部浙江司郎中覃恩進宜人矣禮不貳嫡而封者以君復者以親從上制也禮不喪出母楊出而復學使者命文學喪如嫡夫爲伋也妻者則爲白也母不得謂亾于禮也合葬非古也韓氏之阡有所以從其尊亦猶行古

之道與斯爲酌情禮之衷焉初宜人與衢州年  
相若衢州舉已未進士自金陵來歸侍于燕頃  
卽以憲副公之命廣置副則首進狄孺人憲副  
公歿之歲文學君生而宜人有首子且連舉皆  
男文學狄出爲介子宜人翕然鈞視也公壯而  
免憲副公喪繇刑曹出守衢州以卽世宜人所  
舉三子殤文學年始在外傅楊孺人自外館入  
耦俱多猜有以將不利孺子間于狄孺人者孺  
人良信宜人無它宜人處之晏如也屬文學  
于仲父贈承德公撫而教之以是文學君長且  
不知已所出母宜人而已文學籍博士高等廩  
于公子冠而工藝業寢以顯以昌胙于衢州公  
者悉宜人以也文學事宜人孝病耳痺聞有僧  
善禁方長跽以請而宜人尋有末疾者十餘年  
狄孺人歲時尸糞躬扶掖若事姑也者終宜人  
之身韓氏之孝睦籍籍里閭矣實自陳宜人詒  
之衢州方郎工曹也 三殿成會治  
永陵增重城爲埴有勞動預 宴錫鎡爵一級

爲衢州以廉著衢人士範金像祀公至今曠潦  
鬻禳走祠下神明之公夙嗜古習 國家典故  
若所撰公卿年表惜未就咸以宜人勤恁簡素  
庀壺務故衢州得壹意奉職官下以其餘力事  
博通而修舉鄉社之政爲德于其邑方楊孺人  
之復及文學之爲喪也宜人念不無少拂而衢  
之任楊孺人與偕時時趣衢州以終惠于楊則  
猶寬身爲恕矣居常遇宗戚恩禮有加而御下  
莊以栗然不苛督也性修整訾笑恣春食息作

止皆可爲內則而要以輯龢中外善處嫡庶母  
子間功韓氏甚鉅按文學君行述宜人爲上元  
人衛經歷陳公潛女母顧氏竝甲族以年十九  
歸衢州者十有七年稱未亾人者三十有九年  
距生嘉靖辛丑七月二十三日年七十四卒之  
午甫畢膳命卽徹曰吾行矣宜人嘗授明威錄  
好施予爲塗梁便利事衆蓋以考終爲福報云  
子一卽仲孝邑學生娶唐氏余外舅廣西按察  
使唐公汝迪第三女宜人所生子殤者仲虞仲

亮仲嗣孫二无疾邑庠生娶邑學生邢君繼鯤  
女无亢先宜人四月殤孫女三長適余次子爲  
兄後者士好宣城邑庠生次許漂水行人司正  
楊君公翰子寧含次許大理通判孫君自強孫  
彭年鼎祚先大叅與憲副公同鄉舉文學君余  
忝姻婭稔韓氏事者宜鼎祚俾爲狀以藉手當  
代名碩之采擇而賁諸幽爲韓氏紹明世世也  
進階太中大夫雲南布政使司左叅政先  
府君宛溪先生行狀

萬曆丁丑仲冬先府君宛溪先生終于城第不  
肖鼎躄踊崩隕臨死者數矣堇勉力而始克襄  
事明年圖敘次府君之宦績鄉行以爲狀迺府  
君家居自不言官中事鼎祚長而與燕趙齊魯  
東西浙之士游則多有言府君官中事者山東  
紹興各崇祀名宦移文來郡始得覈其實不誣  
敢綴其鉅者如左以備立言者之采擇府君諱  
守德字純甫寧國之宣城人梅氏惟宣城繁而  
皆非一族唐末有倫叙公授新安郡學教生之

慨之慨生遠五代時爲宣城掾家焉世居郡城  
州學之西自之慨公傳四世爲誠公尚書公詢  
從弟也家世鼎盛公獨不仕遊柏枧樂其山水  
因賦柏枧以見志淳熙間文明公始遷居柏枧  
南莊文明公之子太七公嘉泰間始有墓在柏  
枧又七傳爲榮宗則府君之高祖云榮宗公生  
五子而長爲府君之曾祖珍珍生六子第三子  
友竹公<sub>楷</sub>爲府君大父友竹公四子而府君先  
考爲仲子贈中憲大夫古菴公繼先有四子府

君居長府君生十一歲郡太守胡公東臯聞以  
神童名召至郡面試二文立就且善也挾入衙  
見其夫人諸子而親陪飯焉且諭古菴公以積  
陰騭培福源之說逾年而古菴公見背母劉太  
恭人年三十一諸孤幼者尚呱呱嗚也有家難  
友竹公及繼胡孺人猶在堂太恭人以孑身上  
而奉親下而撫孤內而理家外而禦侮拮据萬  
狀矣府君年十八補邑庠生母恭人郭氏來歸  
嘉靖甲午丁酉並試<sub>邑</sub>庠生督學使姚江聞

人公詮斬陽馮公天馭所特賞是時甌寧李太宰公默由驗封郎謫倅宣合試六邑士獨拔府君及太平太常卿周公怡曰此兩人國器也令交拜郡庭而李公泣盟焉因供之庾舍中朝課夕誦李公博古明當世之故自博士家外靡所不譚以庶幾異日備實用周公卽以甲午舉丁酉府君相繼領應天鄉薦會

肅皇帝方銳意征安南下禮官議郊社分合之典主司策士有國之大事在祀與戎以微諷

上震怒遣緹騎逮至京下于理所舉士百三十五人者不許應制南少司寇吳公悌時爲御史疏掇之 賜杖坐遣戍越三年歲辛丑 上以宗伯諸大臣言許復試南官府君登嘉靖辛丑進士壬寅授台州府推官府君材敏練事至立剖朝發夕報旁大府來聽質者或不下數十人不待再食歸於是有益米梅之謠郡政或溷也又有清香唯有一枝梅之謠台及寧紹竝臨海疆族奴客闌出中國貨海外互市易乘汎揚颿

唐表石室集卷二十一  
官不可誰何而三郡姦徒先有投諸島爲之主  
與者利且不貲倭豐萌矣越東士大夫多兼併  
小民雖中戶無所容閩人舒公汀嚴峻人也來  
爲巡按御史中憤之因極力裁抑豪貴以申閭  
閻條明海禁干掇甚密而于諸司理中獨倚信  
府君事下府君輒以意寬簡行之多所縱舍久  
之舒公以府君非獨材且仁心爲質焉而公之  
威稜亦漸以平部使者先後薦府君于 朝擢  
戶部四川清吏司主事然未滿考也北而奉太

恭人養官邸則太平周公怡以吏科給事中疏  
論相嵩下錦衣獄三年矣時陸炳掌金吾嚴之  
戚也獄甚祕府君時時爲之具橐餽嘗和周公  
和蘇子瞻寄子由二首寄其弟有之又私爲三  
君詠三君者富平楊御史爵豫章劉員外魁與  
周公同在繫者也未幾府君出司徐州倉特循  
永樂之故事而修之務與時宜爲軍民便構駐  
笏亭于署後引水壘石賦詩自適也蓋府君爲  
理時守通州陳公堯名作者從之問詩陳公以

府君秀發盡授之而徐州兵使王公挺鄞之聞人與府君倡和益相得請府君修徐州志旣成歎曰典而則約而瞻真良史才也至今七十年猶行之乙巳覃

九廟恩贈父繼先爲戶部四川清吏司主事階承德郎封母劉太安人封吾母郭氏安人又三年戊申改吏科給事中府君初不自意也分宜秉政久子世蕃擅其權世蕃狡而善牢籠臺省諸人好以酒戲虐人以爲親昵府君故不飲酒

至直視覆杯謝亦不之忤也其私人荐位京兆尹胡奎者謀貳冬卿府君有釐弊政黜庸汚以安遠邇之疏臚列其貪鄙狀顯斥之銓部初欲通選法選人偶不樂遠方故設願告遠方以爲權宜告者每選數百人有援例不數年至州守郡倅者選法愈壞而官常以隙疏報遠方例永停止著爲令載吏部職掌中京兆亦慙沮自引去嚴氏每懸美缺以待賄賄有等府君有卿貳缺員乞錄佚才以克任使之疏 上玄修勤醮

祝太常官皆道士世蕃父子相與為朋比卿徐  
 可成者前得蔭復求改官府君抄出駁不行世  
 蕃先積不平于府君又見建白漸廣圖欲出之  
 者亟矣巴西進戶科右給事中奉命副安遠  
 侯柳公冊封遼府光宅王遼王亦狡而尚道  
 自號清微真人以媚上者也府君與安遠唯  
 正色端詞以對科長東平劉者以府君參駁事  
 有嫌刺刺語世蕃若草一疏再入國門即上矣  
 世蕃重益疑會紹興缺守世蕃宣言于眾曰兩  
 浙之倭勢熾矣惟紹興尚完今須得幹濟彊毅  
 之守吾觀未有踰梅掌科者也今在使願且為  
 朝廷借之眾唯唯翌日吏部推上矣府君封還  
 道聞行還里即身馳渡錢塘而赴之府君至首  
 講備倭之策郡兵頓無所用客兵驕烏合未練  
 於是蒐軍實葺征饜頓者汰而存之驕者厚其  
 月糧而嚴其法比以至繕城垣飭舟械煥然一  
 新而海上諸要害處猶宿重兵焉頃之倭稍緩  
 府君迺召父老而問疾苦以苦莫大于湖稅召

諸生而問風俗以季末之奢靡而違禮傷教也  
先是越民業歸富籍而稅懸貧戶逃亾積額官  
必取盈有司創議均賦湔滌弊源窮年靡定府  
君晉多士曰茲非治事科耶迺分遣經野出乾  
沒者若干畝事獲就緒王文成以道鳴東南府  
君嘗從王龍溪先生畿講學金陵者有年府君  
于是議文成之祀敦請龍溪先生于文成講堂  
以多方訓士士率風動而文成之學復以闡明  
燕饗有禁游觀有禁頒刻三禮圖註于士民俾

士先習相見禮鄉射投壺一一舉行之而尊高  
年禮隱逸有秘圖山人楊珂者府君三造其廬  
不見也碑高士里于其居蓋府君以學爲政以  
教爲治非矻矻簿書期會間而已衆每稱府君  
穎識通達當機應衡爲不世之材始猶觀其表  
而減湖田之稅今家戶能誦述之則以民饗其  
利爾壬子分校浙闡得諸公大圭馮方伯叔吉  
巖太常用和數人皆致顯名諸公者督學方山  
薛公許以爲必解首然實分校者失之先府君

搜得之者也薛公詣府君謝明年癸丑春倭有利謝氏也以一旅掠餘姚臨山泗門受其禍賴府君所宿兵摧破之時府君方 覲留京也甲寅春滿考承德公贈中憲大夫紹興府知府母太安人進封太恭人吾母郭安人進封恭人是年陞山東曹濮道兵備副使東省唯兗西最患盜盜各有大猾爲之保任流徙無常莫之究詰府君爲之鉤校其主名而求大猾之尤者立撲殺之盜無所附麗而縣重購賊曹掾史多所獲一年之內漸以衰止越乙卯改本省督學副使府君教士以身疏條濶日評隲試義錙銖不爽一見而可決其平生乙卯得人東省稱盛萬曆甲辰間甥麻一鳳友吳伯敬會試同寓有登萊人宋知州者攜其子來詢及府君曰此神人也後胡可復見耶而府君持法嚴絕無所殉御史新城耿公鳴世來南巡弔府君子家語鼎祚新城有陳生者富而父兄橫陶真人爲 上祈年泰山也託賂焉真人以檄送陳生于學府君禡

賁之禁錮終其身與真人申明執掌真人而無  
以應也海內稱數良督學必爲府君屈一指逾  
年陞雲南分守左叅政而府君倦宦久且念母  
恭人春秋高也任四月以捧 賀行事畢遂上  
疏乞休次于真州必得請而後渡揚子部覆爲  
照本官夙負才名久歷中外今告休致必其自  
計已審相應俯從但才足有爲終棄可惜合無  
准令就彼回籍致仕待後病痊之日聽有司具  
奏起用外官無起用例蓋異數也府君之得請  
歸也唯是肆力于學叅攷互證獨得之心嘉靖  
甲子耿恭簡天臺先生定向爲南畿督學御史  
羅盱江先生汝芳守寧國相與創志學書院于  
陵陽三峰之上再拜請府君及貢東平受軒先  
生安國沈少叅古林先生寵爲之主遠邇響應  
比屋弦歌咸以爲鄒魯之鄉矣今海內所傳志  
學三先生者是也府君之學以隨處體認爲真  
修以處事當理爲應用以倫常物則爲本宗以  
反躬篤踐爲實地都峰周公每入郡輒留月餘

猶加密訂亦以府君之學爲得其大而且不致  
虛無所歸以教必先於家也羣族之長老子弟  
而爲會會有講禮讓有敘彬彬可觀卽庭內少  
有違言聽之祠不以煩有司有司者府君多田  
居不時見然地方利病必進告緣起流止條分  
縷析郡邑大夫皆聳然敬聽焉若西門胡子甲  
之人命楊伯昊余庚三之盜攀悉誣枉牒已行  
而騎反之中道者也郡中有大興革未嘗不就  
質府君郡太守王公嘉賓之建東溪橋也悉府

君主畫焉太守陳公俊以修寧國郡志請有成  
書爲遠近所傳迄今或一政之紕一事之屈通  
邑必譁然曰安得梅大叅者其人乎府君性端  
方剴直顧率有標尚治一圃環以柏垣而雜植  
花卉其中引客小酌以詩詞相應四方之山人  
畫史縑衣羽流以戲劇謳歌來者亦不拒也濮  
陽李符卿先芳謫丞郡數過從與論風雅之道  
間出而游九華白嶽及吳之虎丘天平石湖諸  
勝處好讀書手無一日釋卷至夜分猶引燈就

讀或令鼎祚旁讀而聽之故多所著述若此者  
二十年如一日也而親奉太恭人甘旨之養者  
十年丙寅秋太恭人以年八十一終府君耆矣  
孺慕備至丁卯隆慶改元

莊皇帝莅政更始 詔錄忠諫舉遺佚臺省諸  
臣上疏陳言而南科道岑公應賓尹公校所舉  
二十餘人藩臬以府君居首下吏部議部覆以  
府君志行才識均有可取查有相應員缺酌量  
推用尋 詔有邊督清理屯鹽之選令九卿科

道各舉所知而工部尚書雷公禮戶部侍郎譚  
公大初刑科給事中查公鐸工科給事中許公  
天琦陳公吾德並以府君薦撫臣則張公佳胤  
宋公儀望按臣向公程以地方人材薦初撫臺  
林公潤行部訪府君于廬居固辭林公必欲一  
見也遂相欽服卽以揭薦于吏部而趣其補用  
廼府君第移書謝薦者而實無一字入都門蓋  
忘世久矣遵 恩例進階一級爲太中大夫府  
君膚腴神王夙少恙丁丑夏秋之交微示脾疾

四明馮公者爲兵使奉府君就醫于湖無効而歸兩月頓不起矣嗚呼痛哉嗚呼痛哉初府君之臨訣也嚴誠以無入鄉賢卽世之數月而兩庠業已舉之鼎祚以治命辭至萬曆之戊申太守大梁金公勵刻期以舉于督學楊公廷筠崇祀焉實非先志也府君以正德庚午六月初五日巳時生以萬曆丁丑十一月初九日午時卽世得年六十有八娶吾母郭氏京兆公說孫女庶母阮氏生子四元祚郡庠生娶劉氏漳平知

縣劉公鑄女光祚邑庠生前府君十九年戊午卒劉以節被旌典鼎祚歲貢士娶唐氏廣西按察使唐公汝廸女庶潘氏王氏鄒氏並吾母郭恭人出耆祚府君六十五而生後公五年殤阮氏出女一恭人出最長適鴻臚寺序班麻涵舉人麻公值子孫二士都太學生潘出娶麻氏河南右布政使麻公溶女士好邑庠生王出娶韓氏高淳邑學生韓公仲孝女是爲衢州公邦憲孫父憲副公叔陽府君丁酉同籍舉者也並

鼎祚出土好嗣兄元祚曾孫六鴻中娶徐氏庠  
生徐君胥慶女象中殤並士都出湛中聘吳氏  
郡庠生吳君士京女郎中聘太學生劉君文昭  
女漳平公之孫也弼中超中幼未聘並士好出  
曾孫女四士都出者三長適通政使徐公元氣  
曾孫造一爲士好出俱幼未許字所著有滄洲  
摘藁滄州續藁無文漫草徐州志寧國府志宣  
風集古今家誠家塾故事而宛陵人物傳資省  
名言理學詮粹景行錄尚未成今將以某年月  
日卜葬于某山之陽謹瀝血濡毫唯大人君子  
名世者貺之一言責諸幽表諸墓道則府君死  
且不朽鼎祚諸孤之百世與有榮施亦不朽唯  
下執事哀而許之不肖鼎曷任皇懷祈懇之至  
謹狀

誥封恭人先母郭太君行狀

先母出黃渡郭宣城郡學生郭公機第二女京  
兆公說之孫也公領成化庚子鄉薦仕順天府  
通判機爲仲子郭與我文峰梅氏世相爲婚姻

郡學公娶劉氏與我王母劉太恭人同出玉山  
爲從姊妹郡學公與母劉皆先後相繼沒先母  
孤伯氏樞撫吾母而女之先府君亦幼孤太恭  
人聞母有賢淑之稱因求聘焉年十五來歸我  
府君府君時年十九游邑庠矣吾家有中人之  
產不甚貧而太恭人性勤約待冢婦猶嚴以爲  
後式母工織紉上食之外卽聞機聲軋軋也族  
有從叔蒲溪公繼儒者名知人善觀文每謂府  
君必貴念古有貴婦而因得貴其夫者則婦亦  
重矣詣太恭人前曰嫂之子必貴也然須得一  
貴婦始相儷試出見之時母方臨機公呼曰卽  
輕身來不必更也出再拜公喜而揖太恭人曰  
端重安詳此貴徵也丁酉府君舉於鄉主司以  
問策迂 上旨所舉士格應制府君意不無怫  
然母爲解之曰一時格應制科名固在也天怒  
不終朝姑待之明年辛丑 上果爲霽怒士復  
得試南宮府君遂以嘉靖辛丑成進士壬寅授  
台州推官吾母侍太恭人以從府君秉政嚴六

邑廩廩而母夙慈愛每以寬和勸府君廳吏趙球者狡人也一日持珠寶首飾假獻鮮以進太恭人發而大恚亟叱去將待府君巡行歸言之母以此必有性命之憂太恭人爲中止第言球不可倚信而已乙巳陞戶部四川司主事是年覃

九廟恩府君進階承德郎母封安人及戊申改吏科給事中也府君感情時事思極力有所建明而奏劾多嚴氏私人母微諷曰有老母在人

臣卽劾節死官下職也奈此尊者何府君好談論四座風生于衆賓無所讓母數陳之曰君不聞盡言以招人之過者乎後竟以辯駁迂寮長譖于言出補紹興守母幸而曰吾知免矣其明達類若此府君爲紹興政不諧俗郡人有郎徐學詩者以刺嚴氏罷歸府君獨禮重之舉人不答拜獨拜陶文僖公大臨宅若隱淪之徒其禮意反在卿大夫之上母言盍亦平等乎迺府君竟以此得過卿大夫甲寅滿考府君進中憲大

夫母安人進封恭人及府君擢山東兵備副使  
調督學也待士嚴法或太峻母恭人曰君師儒  
之官也宜先教而後行未幾府君擢雲南叅政  
疏歸矣歸之明年戊午秋見先二兄同日之喪  
鼎祚方十歲二人者卽哭之慟亦不致毀以傷  
生二兄竝爲弟子員雋穎以苦學致疾府君痛  
之鼎祚不就塾者三年母恭人毅然曰童而不  
牯後將安施命就塾而鼎祚恃愛肆姐至折塾  
師之荆不肯受母恭人立命必受笞初不以孤

子廢嚴也母恭人性婉順然臨事精審凡府君  
莅官處檢柙奴客刻符啓閉務重恣不泄府君  
以司理及爲兵憲多從御史巡行什九在外賴  
以無內顧而母奉養太恭人唯謹烹飪必躬痾  
癢必察爲最得太恭人驩以故每政必從歲時  
膾臘脯腊醢胥醢鱖之屬身爲之監而供饗先  
祀倍加豐潔事極纖細其心力足周行之御下  
甚肅卽奴猾無敢有睥睨者至小過註誤不問  
也母貴矣處宗戚間退然自下如不勝卽幼輩

且引與鈞禮自城歸蒲上妯娌子婦燕會談舊  
事相樂焉當先二兄之夭亾也府君年近艾母  
恭人飾諸姬以進時其起居候其血脈以聞于  
府君有阮氏者累舉子最後生子者祚八歲而  
殤卒以無子萬曆丁丑之仲冬先府君奄爾卽  
世母恭人痛極幾欲偕母子朝夕哭泣無休時  
又五年辛巳秋母恭人食味中肺而病興遷延  
至十一月初一日辰時頓不起距生正德甲戌  
五月二十二日午時年六十有八母恭人少府  
君四年而皆以六十有八冬仲終不肖孤五年  
之中罹此荼毒胡以自存痛哉痛哉母恭人生  
子三元祚光祚並庠生鼎祚歲貢生孫男二曾  
孫男六曾孫女四婚字詳先府君行狀中茲者  
日月有時襄事將及荒毀無文具述崖略唯名  
世大君子賜之琬琰賁諸泉壤以闡幽光而標  
內範漉血銜哀百拜稽首以請謹狀

鹿裘石室集卷第二十一終

鹿裘石室集卷第二十一

宣城梅鼎祚禹金著

文

墓誌

南譙彭次公墓誌銘

不佞從彭博士先生遊廼始習所爲次公者云  
蓋彭氏其先安福人繇皇祖觀受商全椒遂家  
全椒凡六傳而奉政公儒用以儒顯生三丈夫  
子長博士先生渠季瑋天次公生而韶秀負質

奇奉政公屬以博士業業輒工輒病謝博士業  
不理奉諸稗官齊諧繆悠亡希於必獲者間讀  
之病良已當是時奉政公仕爲兗州丞再徙延  
安則次公並從至於岱宗登日觀觀扶桑日出  
黃河如帶勿華蹈襄霍狀寤天體之亾窮曰吾  
其遊方之外虜泱泱東海表在鳧翳因自署海  
漁山人云亾何奉政公捐賓客秦邸博士先生  
籍諸生則次公爲家督性閎廓終不事家人產  
壹意屬詞其詞多爾雅書法顏魯公已精諸家

法或大徑五六尺反覆神王而博士先生故屬  
詞有聲次公賓之里中爲之語曰有棣韡韡彼  
彭氏子而次公頗時時雄於酒有鄰舍釀孰造  
甕下互爲壽甕立罄雅善琴援琴爲主人三弄  
而去其豪致自喜稱是狀竟坐酒故一日嘔血  
至數升醒而之於岐黃家逮朱李多所論著以  
故逝病得不困人有困者卒起之庶幾哉技進  
於道矣越萬曆歲癸酉二月二十五日而次公  
卒距生嘉靖丁亥八月十五日年四十七次公

鹿裘石室集卷三十一  
卽亮介不能苟容其操心長者都人士卒願交  
次公驪延安公宦廉卽次公日入不繼裕如也  
顧急人又不欲居人之德方疾革孳孳念母孺  
人在堂爾嗟夫孝哉博士先生言次公事先生  
終身敬之不衰每淚岑滯下而以子孝廉君夢  
祖狀來曰其不朽於仲氏者其子不佞稽首敬  
諾按狀次公諱璨字玉瑩配朱氏子三夢陶爲  
季瑋後後次公一年卒光祖郡學生娶吳司馬  
潘孫女繩祖聘其女女一適其嗟夫往不佞侍  
博士先生覽光祖文故私心異之迄茲知爲次  
公子卽次公以處士之義終年不躋下壽世所  
稱修業而息之者光祖在矣旣志其軼事而系  
之銘曰

爾名不章沃而光爾季不長壽而臧其宰如其  
畢如宜爾子孫振振兮其斯爲彭次公者與

處士耕隱梅公墓誌銘

蓋今寓內之梅氏唯宣城最蕃宣城凡六七宗  
並祖五代時宣城掾遠遠公凡婁傳至宋而尚

書公詢以翰林學士被遇真廟都官公堯臣詩  
名當代爲宮禁所傳都官四子叔子垞獨不仕  
元豐間遷官莊千里是謂千里之梅千里傳十  
一世而爲我 明之梅惠亨惠亨子永宗並高  
年賜爵一級永宗子玉廩邑庠貢入太學則處  
士耕隱公父也處士爲貢士介子年十三稱孤  
析居董中人產因釋儒而事耕稍長遂自號耕  
隱云千里田頗腴地更宜梨栗處士相原隰占  
兩暘一一中程歲入倍伯季季棣用諸生廢著

處士時時分貲使其子爲什一計計輒左不責  
償復益私與之奉母高孺人就養無方孺人病  
瘳下處士夕顙天請代衣不襍者數月至中裙  
廁踰必親浣滌病良已事伯兄相寒燠飲啖必  
鈞嘗改卜宗祠處士捐重費以從隣有諍百里  
之內率質成於處士片言立解歲饑穀踊貴間  
里閉糴處士價持平自遠至者逝減直佗若孳  
有樵澤有汭治涂建梁諸義舉處士悉出橐應  
之顧處士善區畫貲益以饒郡太守襄陽鄭公

政務道化慎許與聞千里有處士錫之冠服以一吏賫牛酒禮其家先是處士當耆也家大人携鼎小子詣處士爲壽處士沈毅寡言笑步履鮮健諸子若孫咸見客行酒下食進止有度先人歸而語鼎祚處士家法備矣且豐下其後必昌未幾處士孫應魁居喪以毀歿時余父子纂郡志志不載近事特書應魁其孝要自處士身教焉先人見背之明年處士卽世又六年癸未葬後青山祔始祖垆踰十六年巳亥墓木拱矣叅軍時旦將處士治命命鼎祚爲誌與銘脩其闕事抑以鼎祚同所自出也按高文學狀誌曰處士耕隱公諱穗字汝澤生弘治辛亥十二月十六日終萬曆戊寅九月二十九日得年八十八有八娶南頭汪氏正德丙子年二十六以歿繼赭圻郭氏爲司訓 姪敏約慈惠內治甚脩年八十二以萬曆庚辰後公三年歿生子三時昌汪出時景時旦郭出昌景先公卒旦仕河間衛知事遷龍門衛經歷有聲績質行益無忝父風

卽所爲參軍者也孫繼唐應祥應聘並昌出應  
誥應魁應期應科應箕並景出應元應和應舉  
應鼎應鶴並旦出唐瓊山主簿元太學生魁郡  
庠生舉省祭曾孫懋相懋謙懋盛懋隆懋慶懋  
祚懋通懋欽懋銓懋錦懋鈞懋春懋爵懋賞懋  
懿懋孝懋賢懋賓懋芳懋斗懋脩懋榮懋實懋  
齡懋經懋緯懋志懋恩懋憲懋愈懋光懋選懋  
鑑懋昇懋新懋成懋烈玄孫之忠之孝之用之  
學之達之巡之佐之仲之任之尹之祥凡五十  
餘人姻婭右族詳載譜牒嗟嗟先大夫卜處士  
之必昌後者具在茲已汪墓大梨園郭墓徐村  
團欒山不合葬亦猶行古之道也與銘曰  
漢重孝弟勤以力田兼有行義鄉舉必先維予  
宗老三物咸備玄纁弗臨丘園是賁一祝多富  
再而多壽三多男子亦莫不有青山筮吉白雲  
斧封厥後則裕我祖焉從

墓表

將仕佐郎河南

封丘王府教授松溪劉

公暨配王孺人合葬墓表

劉公諱琛字順之宣城玉山人其先本出堯歷漢以火德王劉氏遂顯熾以蕃玉山之劉望彭城自汴徙於宣祖宋侍御史琦慶曆丙申進士琦父湜登景德乙巳第仕屯田員外郎太子贊善至國朝成弘間有彥才者生子昞並納級爲王府典膳彥才初一游於庠而公則是公季子也母陳氏伯班仲琬以處士擁世貲是時吏政寬務與民休養富者優假之比於封君民因以其財力赴公家之急

毅皇帝馬跡及南京余祖贈中憲公爲郡部供億與倖彬等構卒得完蓋娶公姊卽吾大母劉太恭人云公幼不好弄就塾輒攻苦博士業精治詩伯仲日鼓吹燕飲連丙夜而公方坐一室篝燈熒熒伊吾聲琅琅徹曙聞兄弟間操趣不同然各意得也年十五推擇爲邑諸生尋用高等受廩嘗都試學使者頒其文於應天學宮嘉靖癸巳行選貢升六館姚江聞人御史詮來視

學奇公文曰此掄魁才也當留爲鄉校重以其  
從子漳平公鑄應選而漳平與公婁就京兆試  
不遂上公後漳平二十七年以庚申貢司訓嘉  
興郡文藪而公故簡質敦重却士贄且時時斥  
奉以周士士益親附之遷封丘王傳行爭繪  
圖集送吳太宰而下祖以詩解官歸政於家也  
漳平自免令歸久與公偕建祠置祀田修祖壟  
演先人遺訓約其宗而抗法焉宗人一時老及  
耄若漳平公輩凡八人蒞以會酌酒賦詩有香

山洛社之風在其宗猶希有盛事矣大母居常  
言公八歲失怙躡踊哭拜起如成人析產以腴  
孫其兄事其兄如父鼎祚寇猶及事公性方嚴  
訾笑不苟進止不失尺寸誠德禮之君子也公  
生弘治己未九月十八日以萬曆己卯十二月  
十七日終得年八十有一配王氏太學生全女  
能其家先公卒是惟嘉靖辛亥之歲距生弘治  
甲子年四十有八子男二鍵鏤皆力田有行義  
女一適王給事益孫平湖簿三俊繼配麻氏後

公卒鼎祚先叅政府君爲公甥童而孤多族釁  
賴我諸舅以有立而母郭恭人爲公從兄長清  
簿珣女甥先後世爲中表親知松溪公者宜無  
若鼎小子公殯馬三埠牛山之趾與王孺人合  
叔鏤命鼎祚標述其體行碑之墓以示風訓庶  
後之君子過而式焉

處士泰和龍君墓表

余不佞周覽漢事蓋有概于馬少游之言云彼  
其衣食裁足棄下澤車御款段馬鄉里號善人  
斯可矣其指忱約其所取于造物者不亦大廉  
乎哉又見諸長老言

敬宗朝道化敦洽文罔頗疏故其時人耻習機  
利鄉多長者庶幾夫無裒葛天之民以不佞今  
所睹記則無如龍處士者處士諱敷字公寬江  
西泰和人居甘溪里厥先樂山公子儀部叔璨  
淑浦學諭文工部侍郎光慈谿令伯伯生遇遇  
字于郭而生處士處士故席世資然慈谿而上  
皆廉吏無所遺齎用不給遺有書也少讀書輒

通書大義已從人受楷書輒工楷書法迺竟坐  
不給故釋儒術不事而家益旁落矣或風之曰  
丈夫生有事于四方不名高則財雄也者奈何  
鬱鬱自困乎處士不應已咲而曰吾聞之知足  
者足求餘無餘一裘一葛吾以居一丘一壑吾  
以娛人生幾何何鬱鬱爲至晚益簡曠不問家  
人產去而托之焉奕碁對客奕竟日不倦人語  
曰東園逸散支公手談而處士性至孝卽家不  
給事父母力甘毳之奉盡父母驩事諸父諸母  
如父母逶逶循禮無違言終其身口不能是非  
人喜怒不形于色卽臧獲少所譙訶其人大都  
長者也按狀生成化壬辰某月某日以正德癸  
未某月某日歿配張氏子三天爵天愛天舜爵  
張出以子宗武貴贈文林郎蘇州府推官處士  
歿五十六年爲萬曆戊寅而宗武來姑孰郡丞  
先是不佞某與某君者迺並稱古文詞宛之上  
郡丞君方理吳固已耳某君名入宛檄未下而  
車騎過某君繇某君交不佞則嘗與不佞述處

士狀淚涔淫下也宗武生晏先王父墓木材矣  
無能共掃除之役子史氏茲所爲表其幽者以  
辱子不佞唯唯夫世之人務豪舉始率習于機  
利而求羸餘其旣也大而無當寔以傷樸茂之  
風馬少游然者第循其分爾其言已在籍至誦  
誼無窮今安所得龍處士者顧可滅沒其人  
不傳邪而不佞覆有私嘅則以當處士居約世豈  
不謂廉吏何益人徒令子孫患苦爾以今郡丞  
君儼然負公輔望繩美抗宗振振勿替則所稱  
關西清白四世三公者將何以殊焉是益不可  
滅沒不傳也史某再拜題曰明處士泰和龍君  
敷之墓

勅封文林郎吉水縣知縣博羅黃公惟溥  
墓表

博羅城西大屏山之陽有邑君子黃封公之墓  
嘉靖中封公父處士公年四十未舉子也子一  
宅戍籍子及長宅以其子當踐更子出亡事連  
處士卒以處士素長者獄得解亡者尋亦復而

唐表石室集卷三十一  
封公生于處士始有子矣封公嗜學工屬文  
婁爲郡邑所賞識而李令者猶亟推轂之至都  
試輒不售遂去而攻古取楚騷史漢肱篋日諷  
之頗時時稱詩然經術故高鄉士大夫重以人  
師之難也爭遣其子弟來學間延致家塾學者  
誦以次漸通尊禮公稱草庭先生云迺家自脯  
脩外鮮所入而居不戒于火會襄先事有厚費  
悉自其內彭孺人以力給公壹意課讀不問也  
族有逋賦縣官惟公是倚辦而逋者嗾子婦交  
誅公甚至操戈破釜鬲俾不治晨餐公一切聽  
之不問也初人以黃公能忍貧旣以爲公能忍  
詬而公實處之若忘焉是時有二子並蚤慧公  
討而訓之嚴伯仲益自感奮先後補博士弟子  
伯子流芳以

今上巳丑舉進士令吉水奉公就吉水吉巖邑  
也問爲令公直指戒碑曰下民易虐上天難欺  
伯子用以課最勅封公如其官令遷丞松江  
郡奉公就松江郡固饒珍錯綺麗眎吉足豐養

而公不久淹曰吾無以恩兒子輩也凡公歸特里閉故人從于游魚魚雅雅里閉人亦無見公異或有違言質成公而已縣長吏數存公董一報謝絕無所造請而內外親待以舉火者十餘家蓋自其貧時則已假資富人錢殯數喪矣其一卽所爲操戈破釜鬲者也當公在松江署時一昔夢天雨粟被地歸之歲里中大侵盡斥其庾粟以佐賑不謂通于神明哉抑性自有之矣若拓宗祠正祭噐歲時率有事先公而糾輯其

庶姓以施於有政是誠廩廩德禮之君子焉何直以其子貴也公歸以丙申秋七月終于里第臨革猶口占古詩示仲子紹芳蓋踰耆者五年孫男女十人冢孫籍郡諸生噫嘻公其百順之謂備矣伯閔焉以丞時役外不得與哭泣之位也殆終身慕之已請狀請誌復詣余以表隧請丞從弟吏部郎縉爲余所錄士稍聞公質行而史氏區用孺粵人也每稱公有太丘彥方之風夫論自鄉始信而有徵表曰黃封公諱需字惟

溥其先在宋季有文明者自南雄徙博羅數傳  
至瑾善養生顧又善治生具園池華石之勝以  
爲親娛瑾生浩浩生將仕郎克達克達生五子  
季曰鱗卽處士公是爲封公父處士陰行善往  
者亾子復爲撫而置之室竟不以屬伍則封公  
之孝謹行淳備抑有所繇來矣郡丞歷政以廉  
靖名今方由寧國上計班大夫公宜有 載命  
如令甲

傳

比部郎前宣城令尹公傳

比部郎稱尹公官也而令宣城績最著今傳追  
稱之尹公名三聘字子重紹興山陰人舉乙未  
進士爲宣城令上三年考矣而時所在礦事興  
京弁王遇桂以宣城之崑山告兩大璫相次來  
蒞其事兩璫爲南內守備猶貴重弁驚戾人也  
尹公惟之曰彼實已奉 主詔吾何庸亢彼勢  
必浚民以取盈吾何能殉吾知所以與矣迺好  
逞盡斥其俸時時豐餼牽聲樂爲繆恭下至廬

兒小史令具算器食共芻橐以豢之因乘間正  
言邑瘠土民貧山故無礦卽爲冶將功鉅而登  
耗不相直每言輒咨噓欲涕以感懍之蒞者旣  
安公之主禮備又懾于終難以應上求唯令計  
是聽而邑駟猾之牟利或修卻轉相訟訐者公  
一一置之法以解散之于是臺察包礦之議上  
民間初洶洶幾鳥獸竄者始定而宣眎旁大邑  
獨完會復有以權見告者新都一妄男子程守  
訓繇貲郎名總權自其鄉道出宣車徒甚盛宣  
民數千百人俠馘首若聚觀而佯奮袂爭爲譁  
遂大驚竟傳城以去而它璫以權載度江反自  
姑孰咸尹公所畫也當公甫至歲侵穀踊貴公  
請以折色輸漕明年曠公徒而雩以請雨立應  
宣田山圩半圩岸善崩公親行畝澮設十事以  
封塗瀦洩有經式是後卽霖無患澇前政賦緩  
急不時定吏緣闌出入爲姦公爲十限以致期  
至于今著絜令大校尹公材博大通方手披目  
覽耳納口宣五官之用一時瞻舉諸若賻義士

吳仕期之殯白唐觀察汝迪之鄉賢釐睢陽之神叢復王文成及先大夫十先生書院之祀則猶切風教焉公令宣七年辛丑夏晉拜刑部江西司主事歲適更黃籍當路者挽公兩月而畢役稅金凡七千有奇悉上郡行之日祖席臥轅前歌後舞以達於桐川吳興之界前此士民未有也然公雖以廉敏聞而性慈惠寬然長者宣之獄無大辟在比部嘗有所條列意務輕省顧年未艾也遽歿于母安人之喪病得之哀勞以

風厥嗟嗟孝矣抑天之與善何爽耶太安人祁氏方伯公清從女歸封承德公國政是爲尹公父尹公子懋中邑學生有文行負士望尹氏世卿自周重之矣予鼎祚敘次爲傳而系論之論曰夫士未有不修之家而能著於廷者也尹公之以儒士領鄉薦歸也門庭闐然其志度遠矣至少而却奔周急貴而猶益敦孝睦有下車浣旒之風內行飭矣蓋公于文成之學不駕說而實潛體之卽文成之龕濠亂固自其才足辦

若處扈征貂璫間以善全其用誠非有學力不能也尹公于宣之礦事亦庶焉要非直以術而已余聞尹公宋和靖先生焯之後則淵源殆有自故知學烏可少哉

### 醉吟散人傳

白傳當唐開成初退居東都稱醉吟先生自爲傳及其生誌墓曰但於墓前立一石刻吾醉吟先生傳可矣歷數百載而吾宣有醉吟散人者則余爲之傳醉吟散人者陸應龍字化伯宣城

西隅人父槐繇乙科仕承南太僕太僕公始躋子年踰耆生散人生九歲母胡及太僕相繼歿鞠于它姬朱以長也嘗治經術游太學凡三就都試遂棄去壹意治古而喜爲詩且能酒酒可盡一斗許因謝太學生不稱稱醉吟散人酒人詞客若山陰陳鶴新昌呂光升武林姚一貫吳興李華輩咸從散人相酣暢流詠所猶善袁文學鶴聲里之韵士也然使酒難近散人獨溫克具酒德卽醉傀俄啞然咲或烏烏吟而已間醉

歷代名賢集卷三十一  
郊外歸步踉蹌一平頭奴肩負之其任真如此  
以故賢士大夫以下逮田更市僧歲時必招散  
人欲傾其家釀而散人無貴賤長少有招必赴  
不忍逆人驩香山之所謂醉復醒醒復吟吟復  
飲飲復醉醉吟相仍若循環然似正爲散人名  
狀耳方散人之稱醉吟未幾披香山傳讀之拊  
几曰緬想古人先獲我心我心悠悠古人是求  
輒賦醉吟詩屬和成集先大夫和詩載集中顧  
散人形崖落穆而中實卓朗內行淳備居雅不

握籌算迺先人之廬產不少挫與人交率易洞  
達無城府至酌對宗戚輕重繁簡于情禮衷終  
其身敬太僕遺妾而喪慈母朱以三年蓋違而  
道焉識者緣以闕散人之微彼其于醉吟直寄  
焉爾矣散人娶于湯繼楊先後舉二丈夫子可  
象可及並博士弟子負有文行五女皆適名家  
子散人詩有萃芳亭藁金陵藁山中藁宣城通  
詠藏于家詩不顯雕鏤藻繪而超曠之致殆亦  
本白氏長慶云

汝南生曰醉吟先生好佞佛嘗持十齋受八戒散人不佞佛一夕夢登大雄殿禮如來金身者叩之年出一掌示之寤而曰吾年其止五十乎越十八年歲乙酉五十也初微疾與誕期會召所從游置酒爲譚說平生迨革而婦子環泣瞪視曰母怛吾化若有得于禪定焉蓋散人雖用全于酒日唯薺甲蕨牙梨栗茶薺之屬以佐觴不必肥羶都布白裕酒痕淋漓衿裏間不必綺縠而室中無香山蠻素紫綃菱角之聲伎靖儉寡欲此善學佛者也然而無益長短之數者鳧霍分定也白傳董以姪孫阿新後有二子在卽散人五十不夭矣

沈母吳太宜人傳

吳太宜人者諱政封奉政大夫沈公之元妃也沈公世會稽餘姚人占籍順天領鄉薦尋論格事在嘉靖季年

今上初以子吏部郎徵甫貴如其秩母吳稱太宜人太宜人父功曹必仁公奉政父溧陽公者

需次都下並舉室行遂以太宜人歸歸亾何而  
功曹歿于邸遺母寡女弟方待年倚太宜人以  
居當是時溧陽公裝齋且罄姑韓性嚴奉政公  
少而多長者之交相過從有旦夕費悉倚辦太  
宜人太宜人梱以內無違言梱以外無䟽節侍  
寡母而撫弱弟無傷厥心其私茹饘粥不厭歿  
而已會溧陽公丞溧陽僅徙一官去無所貨而  
家益芴落矣奉政由諸生高等受廩故不給奉  
滫髓時時宦于外而太宜人日操作具滫髓上

食蓋無不如奉政在溧陽公前者頃之溧陽公  
疾奉政宦三年矣太宜人穆卜請代至餐不貳  
衣不襞又無不如奉政在溧陽公前者疾旣革  
顧諸宗黨曰安所得吳婦也者而婦之吾卽瞑  
何憾哉徵甫於奉政公爲仲子方奉政公論格  
也一意脩博士業不輟不覆問生產徵甫襁褓  
爾稍長太宜人以身任二子學任奉政公督家  
政二子者徵甫有兄文學君云越

先帝之戊辰徵甫成進士授池州理官奉政公

業倦遊獨太宜人與俱卽徵甫日具滫髓上食而太宜人日操作以爲常徵甫職刑獄每退食輒問所平反幾何所未減幾何斤斤若不疑母然比治獄余郡一郡稱平迺今知太宜人教也部使者檄徵甫入 賀徵甫察母宜人色微瘠逡循不欲行太宜人召徵甫而命之若詎以吾遽棄柁棹乎夫禮君言不宿于家詩亦有言虎拜稽首天子萬年則若今日之後矣徵甫唯唯行閱月而太宜人以天年終惟二季在事少徵

甫室俞氏者眡太宜人若太宜人眡溧陽公然俞宜人別有傳太宜人終之又明年徵甫起家青州守故官上最贈太孺人迄于太宜人實再命矣徵甫語余先宜人性婉嫕然有亮概有蒼頭從舍中逸里社豪者詐恐之意有需也太宜人呼蒼頭出曰卽如法奴死瘞耳何至啖它人金爲豪卒以媿屈吳功曹歿太宜人遜歛如禮應文甫翦髮而太宜人夢功曹指應文曰是兒當貴嘗以是及家奉政相慰藉云樹有實樹者

不及饗之誠盡然傷焉涕而實也太宜人年四十八四丈夫子長文學君應欽次應文南京吏部文選郎卽徵甫次應麟應暘孫男五人其生卒戚屬具徵甫同舍郎周君狀同籍太史沈君誌中初太宜人生而有吉徵王父刺史公絕奇之曰不于其身于其子孫人言越之俗襍已而果然余南遊辱交徵甫徵甫子爲余郡史君司理甥介于余爲傳贊曰余先人

世宗朝出守會稽余故得攷其故實王句踐時越處子以劍俠顯及漢而曹娥以孝顯以今觀太宜人于功曹于溧陽也殆勤于內外矣至所稱折里豪事何俠也仲子言母宜人十歲通女史諸經其戒仲子北征時引述詩禮固斌斌焉夫會稽者以禹登其山會計名禹有龔山氏誕啟敬承數千載而女德不衰豈亦禹之遺烈邪

江母楊孺人傳

夫自劉中壘而下類傳列女然以今概古又何

闊焉鮮睹哉余不佞雅遊都人士善新都吳生  
 則吳生時時為余稱楊孺人云蓋生為孺人甥  
 而會其卒也來請傳孺人事多概于古故可傳  
 傳曰楊孺人者歙楊翁彥綱女也年十六而歸  
 江處士潔處士有母在故卞急鮮當于諸新婦  
 而孺人自介婦中得當姑會姑病處士從孺人  
 穆卜以身禱孺人長跽而泣曰天乎子固職烝  
 嘗也者而天脫悔過於姑氏愿以及新婦翼日  
 病良已眾傳禱之夕姑室中間有異香云而處

士嘗用賈徧燕薊吳越致甘毳母孺人孺人具  
 匕箸修而上之日惟謹即姑耄展轉牀第間孺  
 人至躬為除穢諸媵御請代也謂此寧孫若輩  
 勞乎新婦實中不自任爾而姑當歿執孺人手  
 曰夫人死而無知也死而有知則庶幾以令子  
 報生者是時孺人業舉有子矣而亾何夢姑劍  
 一子來口喁喁語以報若讐昔者之言期而遂  
 載舉子大都孺人以孝顯而余往受諸吳生孺  
 人性婉孌訾笑不苟顧有丈夫才處士父豪俠

好客四方客結轍而游其門則以屬處士主客  
 孺人率為供張佐客驩處士以無失驩父人有  
 誣處士仲殺人者獄且具處士力捐金脫之仲  
 脫而用稍詘矣孺人念處士以急仲故出裝資  
 處士舉鹽筴越中數年而處士稱鹽筴祭酒仲  
 又死為字其諸孤俾有立此豈直丈夫才不抑  
 亦義亮乎哉屬萬曆戊寅某月某日而孺人卒  
 距生之日春秋凡七十有六子二東鳴餘姚縣  
 丞東鳳郡博士弟子則孺人姑所為報孺人者  
 也鳳嫻于文學多長者之交而奉母孝即孺人  
 不責報孺人姑以報生者之言讐矣余不習鳳  
 習鳳以甥吳生蓋孺人女適諸生吳文察而吳  
 生萬全者文察子

汝南生曰余聞之江與楊並閭右族故貳焉楊  
 翁初未有舉舉孺人貴甚然卒以處士才尚處  
 士即楊諸父有後言勿悔而孺人茂著內德迺  
 今世肺腑親也新都多豪舉之士輒務報施以  
 江楊為平而其後益昌熾亦可以風矣

史安人傳

史安人胡氏者懷寧尉楠女以嘉靖辛亥生是時餘姚有日者言奇中其言安人必令德早貴安人祖吏目公者好相人亦復奇安人且聞史家兒元熙也爲具召史君元熙而與湯孺人者又復奇史君因以安人歸史君及歸之明年史君舉於鄉又三年成進士爲寧國司理封安人孺人安人封則以史君爲司馬郎云時多戚屬在京邸諸夫人飛袿垂髻翟車翠葆往來相望如神仙中人顧獨安人足不踰梱閩居恒樵布自如也而郎出爲江西按察司僉事安人與俱僉事入賀行則安人守署中嚴扃鐫檢奴客雖魚菜無所取而僚宋大夫者怪以爲署中間無人迺舉酒酒史君蓋余猶記史君理余郡嘗從部使者行縣子且病安人秘不肯延醫郡太守以醫來竟却之以故史君所至多吏能清白固自致之乎抑安人力也然史君在江西卒中蜚語以謫歸道遇風江怒舟置絙絙與風倚挾

日不得上覺史君意息稍拂也安人進曰君不聞宦者幻耶幻莫如風此其風蓬蓬然起於北海蓬蓬然入於南海吾誰使尸之史君大笑謝相與飲至醉楊枌檝歌屈子遠遊以自廣而且不卽天官謁留連里中者踰年則安安人也而安人物矣安人物之年三十七耳業舉五男子三女子其於諸子女極慈之然時裁以義不可少假至臧獲反覆用恩勝史氏自給事平陽而下輒宦貧僉憲君猶好客飲食張御悉責自安人而安人嘗有餘以爲惠宗黨且益倍外家姑宜人疾時從平陽于竟陵而安人在司馬舍方蓐也聞之夜百拜斗下請姑命凡四挾日疾良已歲時修祀或上食平陽宜人所必安人手是出曰吾何可以人而養吾親往吾知安人足智明惠迺庭內孝敬亦甚具抑以其恒德邪吏目名本深平陽公者平陽郡丞自上也史君其子先爲竟陵守

汝南生曰胡懷寧疫而安人母嚴侍湯藥露禱

以身代廼懷寧果起嚴代之若安人者誠天性  
要有所繇來矣史君又言安人嘗勸我置妾我  
不可夫能使其夫固不可者必有其不可者哉  
而安人固多美男子亦有天幸初以安人必令  
德蚤貴及吏目公以壻史君也言悉中然不知  
其年故何焉余聞史君以繡衣安人謝不御曰  
吾福自少餘諺有之惜福得福則安人固已縣  
知之安人性沈深慎容止寡言笑與史君情好  
甚篤然莊史君終不敢以色進而年不蔽德悲

夫

姚氏世節傳

宣之姚以世節聞自湯氏始蓋湯教諭顯者生  
女而適姚鳳翔居十三年鳳翔謁教諭於仙遊  
以死湯聞而慟絕欲殉者數矣是時子汝弼甫  
二齡已疹幾殆湯以身籲天得猝起家故貧然  
不以貧輟汝弼學遣從其舅氏誠之曰女孩而  
孤吾雌而無雄而欲以吾宗亢焉難矣汝弼感  
憤修業益勤爲郡弟子寢受稟會里中貢東平

郭辰州兄弟方傳學東越汝弼復從於游歸則湯氏每質所聽說舉以對未嘗不稱善也嘗手植杏於庭顧汝弼曰吾老矣樹有實樹者將不及饗之遂欷歔泣數行下未幾杏且實湯年踰者子婦率跽進以爲常物而汝弼顏其堂曰存杏諸卿大夫士詠歌之事在德靖間迨今辛卯天子察汝弼績學行廉孝 詔贈奉政大夫真定郡丞如子官丞爲余師姚先生嘉穀云湯氏有女孫三巽英適仲克讓讓死無子伯氏爲賦長廢著心利仲產而佯謂若年二十奈少何業與豪約必嫁豪巽英徐應曰彼固欲冀生者耶將輿尸耶豪懼而止而縣官督伯賦日亟侵仲產盡巽英值歲歉無所得食日啜水一杯而已或挾日不出戶卽母家來逆不應也曰生仲婦死鬼耳吾將安之凡三十年迺終先是婁屬姚先生必起克讓與合葬祖塋同穀共穴且從其先人禮也巽英之次離英適徐世哲舉有子徐氏疫盛行及世哲死離英業有身絕粒不進舅

姑爲設諭曰夫死節與撫孤孰難乎且娠者未  
生生者未長也等死抑何益死者而獨取節爲  
因疆起越三月舉一子而後舉者竟殤長旣昏  
與其婦相繼夭伯酒人無賴凡舅姑喪悉倚辦  
離英喪畢而離英半菽食取給織紝而已次允  
英笄而適郭別駕子守恒居丁埠守恒爲吏趨  
府舟覆死梁下大索不得允英遵水北嚮掩面  
哭十日屍逆上如生恒二子皆允英出尋亦皆  
殤嫡姑子後守恒死姒卽更適而允英又不甚  
安於嫡姑別駕與之田田瘠時時致絕乏間語  
所親曰吾少病左臂不能舉而吾夫眎若右臂  
也者其心壹其形忘也吾茲忍貳焉允英年五  
十有四離英年五十有六與巽英格並當旌而  
二弟尚在竝贈奉政女

梅鼎祚曰余郡山峭激而水小負故非獨士大  
夫多直節殆亦有女德焉卽姚氏所稱或以祖  
若孫相勸而成或以多窶人瘠土誠易爲善夫  
然將無概乎無所興而用財爲衛者也逮湯之

後有奉政有郡丞先生不且謂天道猶酌挹此  
注彼邪顧三英者之血胤不傳又何也要貴皎  
然不自欺其志云爾若兌英之不以色進郭氏  
子之不以色退此豈務施報其庶有古之遺乎

### 謝母許孺人傳

謝母許孺人者歛許村許天季女歸黃山謝長  
君澤謝許並歛北鄉距半舍世相爲昏姻澤父  
處士公茂高有二子伯澤仲沛澤因稱長君云  
孺人之歸也長君病幾甦是時處士公有貳室

孺人侍長君湯藥惟謹進而上食處士公若姑  
吳必和旨備歷三年而甦者起則姑捐養孺人  
事貳如其姑處士公若吳存也者得壹意出爲  
賈家漸饒未幾卽世伯仲仍以賈往來吳越齊  
魯間里中機利者意孱可乘也爭與構爲鬪伯  
仲又什九在外孺人自匿跡日益爲恭孫卒亦  
無以難孺人故伯仲復得壹意賈不挫其家旣  
仲及嗣無幸天遺孤四齡孺人泣語長君曰若  
敖氏而我叔姒乎乃鞠孤于孺人會疹且殆者

數矣孺人晨夕勤醫禱有厚費稍長出入服饌與子鈞蓋孺人生五丈夫子曰應時應暘應物應大應橋而長君學應暘以儒籍博士弟子有文譽諸循循雅勅其教也實皆孺人內贊焉應橋者先是里之豐谿久病涉處士公斤貲以梁者凡三爲役至嘉靖辛酉以水圯長君私與孺人計舉其故榷石令堅緻更拓大之梁成而應橋適生遂以名紀天貺亦先志也長君以痿廢屬應時賈清源先長君以卒未有後而後以應暘子承宗鞠於孺人若鞠仲之孤也者以有立婦方氏以節聞大校孺人性慈惠然頗卞急其慈施宗黨戚屬下逮臧獲而獨嚴於子婦操奇贏以息以儉持無鼎臠純帛之奉而饗先饋賓必瞻潔時時佐長君義舉若梁豐谿之屬固何直以陰嗇務完物爲孺人始以年十六歸長君終之歲爲萬曆庚子年七十餘壽矣月日與長君考終之辰相次子姓昏娶悉甲族具誌狀余特以承宗請爲傳傳其最著者如此承宗之言

曰吾誦李令伯陳情而感其報劉者也今承宗  
由家孫當戶寢用儒術起必有所以報孺人者  
汝南生曰余觀于謝母何家多故哉迺竟以振  
卽長君材而內政非孺人其孰以顧事其貳與  
姑敵字其仲之孤與子敵也于婦爲難能至所  
稱匿跡日益爲共者其柔勝耶然持門戶以健  
也予世交于謝氏若少連昆昴與其孫於宣近  
又識巨卿延之皆無忝烏衣諸郎蓋歛之謝其  
先爲宋右諫議泌而實自會稽徙以祖晉太傅  
安迄于今非獨其後以文學昌耀且有女德焉  
可謂華胄矣

貞母鄭太孺人傳

今上之甲申乙酉間余出僉楚憲視學政行部  
邗中而今寧國郡丞鄭君和乾先後首邗士其  
秋鄭君薦于鄉因以知本母太孺人教云已而  
有名太孺人貞母者余詰所司不以報則太孺  
人固不欲爲名也者后十年鄭君用延津令最  
勅封母太孺人令甲婦一命以上卽貞不復預

旌典余第覈其實而傳之傳曰鄭太孺人張氏者昭信校尉綱女也而歸贈文林公如岳贈公父佐仕陵水令終于官令潔廉無所遺贈公幼孤侍母葉太君以廣柳還而產漸以挫然太孺人世祿家本饒及歸食貧也恬然安之日椎布操作以翊葉太君而又時時私治甘腍以羞于太君俾贈公得壹意攻儒術無內顧憂以故贈公游鄉校聲藉甚迺竟年甫彊齋志以坳太孺人始踰壯哭而瀕死者數矣是時所舉三男子

皆貌焉未有立曰吾以生殉死者抑何難而死者何以立生者稍彊起攝家秉貲用婁絕勤織紉繼之而勅鄭君學甚力或夜丙篝燈熒熒伊吾之聲與機杼軋軋襍出也久之鄭君獲薦一再對公車念母孺人春秋高遂謁選令洛之延津洛薦曠大飢鄭君躬循阡陌務賑貸建常平以贍其民于是歲稔有瑞穀之異且興學課文以訓延人士延士大夫歌詠之咸推所自太孺人太宰李公辭猶實錄焉旣鄭君遷丞饒州也

太孺人壽近耄留里居督鄭君以大義速戒行君抵饒中慕太孺人不置亟圖歸會饒有礦稅之後人情騷動部使者方倚重鄭君攝守不得請未幾則太孺人之訃聞矣太孺人微示疾適與誕日會晨而具饗朝先祠退以其餽集子婦斥簪珥分賚有差所絮語仲季歛必以布素窻必以贈公從蓋往拜封時鄭君奉翟冠緋袍以進太孺人烏嗟飲涕曰未亡人安忍御緋董服皂而已卽迎養令署中率常饌無加籩也大

校太孺人性簡澹少讀書傳通大義故動必協禮合窻却緋情也其於禮且衷余聞鄭君持太孺人喪戚易備夫亦有所受之乎至君爲寧國三署篆以廉著卽不必受之陵水亦無媿迺祖矣仲季諸孫並文學高等別詳誌狀茲不列

柱下史曰文林公之物距葉太君兩旬耳是毀滅性者也不無過過于孝矣卽葉陵水繼妃也約身而以成其子貞曷以加焉貞若孝蓋鄭氏世有之益以論于祖孫也矧其廉矧其廉而皆

不欲為名也者難能哉

鹿裘石室集卷第二十一  
終

